

ԿԱՆՈՆԱԿԱՐԳ

«ԱՐԳԱՆԻ ՊԵՏԱԿԱՆ ՀԱՄԱԼՍԱՐԱՆ» ՊԵՏԱԿԱՆ ՈՋ ԱՌԵՎՏՐՈՅԻՆ ԿԱԶՄԱԿԵՐՊՈՒԹՅԱՆ ՄԱԳԻՍՏՐԱՏՈՒՐԱՅԻ ԸՆԴՈՒՆԵԼՈՒԹՅԱՆ

1. Սույն կանոնակարգով սահմանվում են «Արցախի պետական համալսարան» պետական ոչ առևտրային կազմակերպության (այսուհետ՝ համալսարան) մագիստրատուրայի ընդունելության հիմնական կանոնները:

2. Սույն կանոնակարգի իրավական հիմքերն են՝ «Կրթության մասին», «Բարձրագույն և հետբուհական մասնագիտական կրթության մասին» Լեռնային Ղարաբաղի Հանրապետության (այսուհետ՝ ԼՂՀ) օրենքները, ԼՂՀ Կրթության և Գիտության նախարարի կողմից 2008 թվականի ապրիլի 25-ին հաստատված «ԼՂՀ բարձրագույն ուսումնական հաստատություններում մագիստրատուրայի ընդունելության և ուսուցման կարգը հաստատելու մասին» N 57-մ հրամանը, համալսարանի կանոնադրությունը և այլ իրավական ակտեր:

3. Համալսարանի մագիստրատուրա կարող է ընդունվել բակալավրի, դիպլոմավորված մասնագետի կամ մագիստրոսի աստիճան ունեցող անձը՝ մասնագիտական գիտելիքները խորացնելու, վերամասնագիտանալու, ինքնուրույն գիտական ուսումնասիրություններ կատարելու, մասնագիտական գործնական, նորարարական, տեխնոլոգիական զարգացումներ ու նոր հնարավորություններ ընկալելու ունակություններ ձեռք բերելու և մագիստրոսի որակավորման աստիճան ստանալու համար:

4. ԼՂՀ կառավարության կողմից տվյալ տարվա մասնագիտությունների ընդունելության ցանկը հաստատելուց հետո համալսարանի մագիստրատուրայի աշխատանքներով զբաղվող ստորաբաժանումը զանգվածային լրատվության միջոցներով տալիս է ընդունելության հայտարարություն՝ մասնագիտությունների, տեղերի և կանոնների վերաբերյալ:

5. Մագիստրատուրայի ընդունելության անցկացման համար համալսարանի ռեկտորի հրամանով և նախագահությամբ, ստեղծվում է ընդունող հանձնաժողով, որի կազմում ընդգրկվում են համալսարանի ուսումնական աշխատանքների գծով պրոռեկտորը, մագիստրատուրայի աշխատանքներով զբաղվող ստորաբաժանման ղեկավարը, ինչպես նաև ֆակուլտետների (ուսումնական ստորաբաժանման) ղեկավարները:

6. Մագիստրոսի աստիճան ունեցող քաղաքացիները 2-րդ մագիստրոսական կրթություն կարող են ստանալ միայն վճարովի հիմունքներով:

Հավատարմագրված ոչ պետական բուհերի շրջանավարտները համալսարանի մագիստրատուրա կարող են ընդունվել միայն վճարովի հիմունքներով, ընդ որում նրանք պետք է քննության արդյունքներով հաղթահարեն տվյալ տարվա համար մագիստրատուրայի ընդունող հանձնաժողովի կողմից սահմանված անցողիկ շեմը:

Արտերկրյա քաղաքացիները և քաղաքացիություն չունեցող անձինք մագիստրատուրա կարող են ընդունվել միջպետական և միջգերատեսչական պայմանագրերի կամ համաձայնագրերի հիման վրա, լրացուցիչ տեղերի հաշվին, ինչպես նաև վճարովի հիմունքներով՝ սեփական նախաձեռնությամբ:

7. Մագիստրատուրա ընդունվելու համար դիմորդները ներկայացնում են հետևյալ փաստաթղթերը՝

1) մագիստրատուրայի ընդունելության դիմում-հայտը: Դիմում-հայտում դիմորդը կարող է նշել առավելագույնը 3 մագիստրոսական ծրագիր՝ ըստ նախապատվության: Հայտում նշված առաջին ծրագրի չբացվելու կամ մրցույթի արդյունքում չհաղթելու դեպքում դիմորդը մասնակցում է երկրորդ ծրագրի մրցույթին, այն չբացվելու դեպքում՝ երրորդ ծրագրի մրցույթին: Ծրագիրը չի բացվում, եթե ուսանողների թիվը չի համապատասխանում համալսարանի գիտական խորհրդի կողմից հաստատված որոշման պահանջին:

2) բակալավրի, դիպլոմավորված մասնագետի, մագիստրոսի դիպլոմի և դրա հավելվածի (միջուկի) պատճենները (արտերկրյա պետություններում բարձրագույն կրթություն ստացածների համար՝ փաստաթուղթ նրանց կրթության համարժեքության մասին),

3) ինքնակենսագրությունը և 3 լուսանկար (3x4 չափսի),

4) զինվորական գրքույկի բնագիրն (առկայության դեպքում) ու պատճենը,

5) հրատարակված կամ հրատարակման ընդունված գիտական աշխատությունների ցուցակը (դրանց առկայության դեպքում),

6) ընդունելության ծառայությունների (քննությունների կազմակերպման և անցկացման) համար գանձվող վճարի անդորրագիրը:

8. Մագիստրատուրայի ընդունելությունը կատարվում է 2 փուլով:

1-ին փուլում մագիստրատուրայի ընդունելությունն ըստ մասնագիտությունների անցկացվում է ԼԴՀ կառավարության կողմից հաստատված՝ պետության կողմից ուսանողական նպաստների ձևով ուսման վարձի լրիվ փոխհատուցմամբ (անվճար) տեղերի համար:

Առաջին փուլի մրցույթին կարող են մասնակցել համալսարանի ընթացիկ և նախորդ տարիների այն շրջանավարտները, որոնց ավարտական աշխատանքի պաշտպանության և ամփոփիչ ատեստավորման քննության, ինչպես նաև դիպլոմի հավելվածում գրանցված առարկաների միջին որակական գնահատականների ցուցանիշները համապատասխանում են տվյալ տարվա համար մագիստրատուրայի ընդունող հանձնաժողովի կողմից որոշված անցողիկ բալին:

1-ին փուլով մագիստրատուրայի ընդունելությունն անց է կացվում ընթացիկ տարվա հունիսի 10-ից մինչև հունիսի 30-ը:

9. Առաջին փուլում ուսանողական նպաստների ձևով ուսման վարձի լրիվ փոխհատուցմամբ (անվճար) թափուր տեղերի բաշխումը իրականացվում է համալսարանի առաջարկությամբ՝ լիազոր մարմնի հրամանով:

10. Երկրորդ փուլում վճարովի համակարգ կարող են ընդունվել համալսարանի և այլ պետական ու ըստ մասնագիտությունների հավատարմագրված ոչ պետական բուհերի ընթացիկ և նախորդ տարիների շրջանավարտները: Ընդունելությունը կատարվում է մրցութային հիմունքներով, իսկ այլ մասնագիտություն ընտրելու դեպքում դիմորդը պետք է մագիստրատուրայի ընդունող հանձնաժողովի կողմից որոշված ժամկետներում հանձնի ընտրած մասնագիտության բակալավրի ամփոփիչ ատեստավորման քննական ծրագրին համապատասխան քննություն և քննության արդյունքներով 8-րդ կետում նշված միավորը հավաքելու դեպքում նա կարող է ընդունվել մագիստրատուրա: Քննության վերահանձնում չի թույլատրվում:

11. Երկրորդ փուլով մագիստրատուրայի ընդունելությունն անցկացվում է մինչև ընթացիկ տարվա սեպտեմբերի 1-ը:

12. Մագիստրատուրայի ընդունելության մրցույթն անցկացվում է հետևյալ չափանիշների առաջնահերթությամբ.

1) առաջին փուլում առաջնահերթությունը տրվում է նախորդ ուսումնառության ծրագրում ցուցաբերած ընդհանուր առաջադիմության գումարային միջին գնահատականին կամ միջին որակական գնահատականին.

2) երկրորդ փուլում առաջնահերթությունը տրվում է նախորդ ուսումնառության ծրագրում ցուցաբերած ընդհանուր առաջադիմության գումարային միջին գնահատականին կամ միջին որակական գնահատականին, իսկ մասնագիտության փոփոխման դեպքում՝ հանձնած քննության արդյունքներով ստացած միավորներին.

Հավասար միավորների դեպքում առաջնահերթությունը ըստ հերթականության տրվում է՝

- մասնագիտական առարկաներից ցուցաբերած առաջադիմության գումարային միջին գնահատականին կամ միջին որակական գնահատականին,
- տպագրված կամ տպագրման ընդունված գիտական աշխատությունների, թեզիսների և զեկուցումների առկայությամբ,
- ոչ մասնագիտական առարկաներից ցուցաբերած առաջադիմության գումարային միջին գնահատականին կամ միջին որակական գնահատականին:

13. Համալսարանը մրցութով անցած անձանց հետ կնքում է պայմանագիր, որի տեքստը հրատարակվում է ընդունելության հայտարարության հետ և նախապես տրամադրվում դիմորդներին:

14. Մագիստրատուրայի ընդունելության փաստաթղթերը հանձնելիս դիմորդը պարտավոր է մագիստրատուրայի ընդունող հանձնաժողովի կողմից որոշված չափով գումար վճարել փաստաթղթերի ընդունման և ձևակերպման, ինչպես նաև քննությունների կազմակերպման և անցկացման համար, որոնք, անկախ մրցույթին կամ քննությանը մասնակցելու հանգամանքից ու արդյունքից, վերադարձման ենթակա չեն:

15. Լիազոր մարմնի կամ մագիստրատուրայի ընդունող հանձնաժողովի որոշմամբ առանձին մասնագիտությունների ընդունելության համար կարող են սահմանվել առանձնահատուկ պայմաններ և պահանջներ:

16. Մագիստրատուրայի վճարովի համակարգ ընդունված դիմորդների հրամանագրումը կատարվում է ուսման վարձը վճարելուց հետո՝ ըստ մասնագիտությունների և մագիստրոսական ծրագրերի: